

四庫全書

集部

欽定四庫全書

東澗集卷六

宋 許應龍 撰

制

吳澗除寶章閣直學士知太平州制

載惟當塗夙稱道院其在今日實為要衝匪賴隨機應
變之才曷盡思患預防之計具官某疏通無滯剛毅有
謀隨所至以有聲蓋無施而不可剖符巨鎮善政以得
民心持節行臺給餉不絕糧道擢從次對正陟貳卿念

南徐既著於勲庸而采石尤資於備禦疏恩北闕改司
藩屏之權寓直西清庸示褒遷之寵益懋乃績以副予
知

吳淵除戶部侍郎淮東總領知鎮江府制

給餉不絕既騰辦治之聲有功見知可後褒遷之寵肆
頒渙號以穆師言具官某識敏而明氣剛以直藹然譽
望既表表以出羣措諸施為尤多多而益辦入則為羽
儀於班列出則著勲績於節旄戢吏愛民允稱宣化承

流之職理兵足食務為折衝強本之謀予嘉乃勲用錫
爾祉俾為真於民部庸增重於餉臺仍兼藩屏之司益
壯安強之勢徒得君重冀寬憂顧之懷益圖爾庸嗣沐
便蕃之渥

趙以夫除右文殿修撰樞密副都承旨知慶元
府主管沿海制置使制

朕惟鄞城巨鎮海道要衝匪資隨機應變之才曷任御
衆牧人之寄以爾佩服儒術標的宗盟使節州麾隨試

輒效卿寺省閨所居見稱暨協贊於樞庭益潛攄於妙
畧屬茲謀帥無以踰卿躋導旨之穹班仍陞華於祕殿
徒得君重以寬憂顧之懷勉為朕行亟底拊綏之績課
最來上恩渥何涯

李大同除寶謨閣直學士知平江府制

載惟姑蘇甲於西浙人稠地廣夙稱富庶之鄉事簡俗
淳當尚中和之化欲使十萬戶之蒙福必資二十石之
惟良具官某老成典刑剛方直諒自登表著徧歷清華

由言路而至文昌杜私情而執公法遽循更迭出任藩
宣爰進職於西清俾分符於左翊以儒術而飾吏蓋所
優為推善教以得民佇聞治最欽承予命益展壯猶

史宅之除待制知寧國府制

剖竹分符方畀藩宣之任疏恩易鎮式昭委寄之隆具
官某稟性謙和提身端謹世濟其美徑躋持橐之班父
教之忠備識蒞官之法欲詳試近臣之政遂令佩太守
之章改畀潛藩俾膺近次其勉圖於治最庶益振於家

聲

余天錫知福州制

均佚祠庭已屢更於歲籥興思宣室肆擢鎮於帥垣式
渙明綸庸昭隆眷具官某謙和而忠厚信敏而疏通七
載立朝徧歷清華之選八命作牧載宣彈壓之威自辭
常伯之班久戢壯猶之展今予命汝往司屏翰之權祇
服厥官茂著撫綏之績佇聞善最嗣有異恩

李曾伯知岳州制

岳陽為郡當上流之要衝思患預防非通敏長才曷勝
其任以爾究心謀略有志事功久歷邊陲備嘗險阻列
屬戎監贊畫帥垣善應變以隨機可牧人而御衆爰畀
藩宣之職仍兼節制之權勉著勲庸以寬憂顧

俞垓知安吉州制

廉吏民之表也承流千里苟得人而用之則其身正不
令而行矣以爾議論識見蔚有父風和粹靖共根於天
性總司舶市人服其清遂迭畀於郡符旋擢陞於朝列

由司匭而至郎皆稱厥官載惟輔藩當擇良吏肆以命汝孰不謂宜節用愛人興利革弊蓋爾所素明者課最來上恩渥何涯

趙汝柄知嚴州制

嚴陵密邇京都素號望郡非朝紳之有聲績者不畀也由別駕而升允為異擢以爾強敏疏通優於吏治例條關決綽著聲稱晉東州麾仍兼泉監其委寄蓋不輕矣正身帥下薄斂省刑檢察吏姦使無病吾民則予汝嘉

往究乃心以圖報稱

劉煒叔知泉州制

溫陵大藩民繁事夥蠻舶萃聚財貨浩穰苟非公廉練
達之才曷著牧養阜通之績以爾美由世濟學本家傳
踐更百為精勤一意廬陵善政靡人不稱晉陟郎闡庸
示褒寵載念南土寢不逮前整頓一新正資敏手疇咨
輿論咸曰汝宜往服厥官以稱朕意

劉震孫改知安吉州制

雲川去天尺五湖山清秀人物阜蕃為浙右佳郡非廷
紳之有資望者不畀也以爾毓德名家敏明直諒立朝
以來屢進忠嘉省闈彌綸寢階顯用欲奉親而丐外爰
錫命以分符戢吏愛民省刑薄斂使田里相安而無愁
歎怨恨之聲則予汝懌課最來上嗣有異恩

韓休卿知融州制

朕篤近舉遠一視同仁至於嶺嶠之遙亦遴循良之選
以爾元勲之裔四紀官塗三佐侯藩晉參議幕調兵禦

寇贊畫宣勞擢守玉融庸示褒寵布宣德意使遐邇之
氓如在畿甸則予汝嘉往究乃心以須選表

陳滌知宜州制

宜山去天遼邈迫近蠻獠民弱而貧非循良之守鎮以
清靜曷安其生以爾毓秀名家疏通詳練踐更滋久所
居見稱肆觀爾能擢守南土布宣德意使斯民受賜如
在畿甸則為稱職課最來上朕不汝遺

魏了翁知紹興府制

不見賈誼方興宣室之思爰命君陳往任東郊之尹益
隆委寄庸示眷知具官某間世真儒斯民先覺以學問
淵源之邃為黼黻河漢之文惓惓憂國之忠無言不盡
蹇蹇匪躬之節所守彌堅甫晉陟於樞庭即宏開于督
府趣還廊廟莫遂挽留旋畀藩宣復堅遜避然大賢之
去就係四海之觀瞻載念會稽密邇王室徒得君重庶
帥閫之增輝勉為朕行冀京師之蒙福雖暫勞于鎮撫
行大展于經綸尚體至懷亟祗成命

王遂知平江府制

用之則行方叱西征之馭引以自近復分左翊之符宣
王化以承流庶京師之蒙潤具官某定而能應直哉惟
清惓惓懷憂國之忠蹇蹇厲匪躬之節施無不可豈惟
振職于憲臺事宣辭難尤欲宣威于制閫遐不謂矣朕
深念之與其勞十乘以啟行孰若易一麾而出守使見
日覺長安之近無登天嗟蜀道之難茂對殊休勉圖治
最

王琮知常德府制

武陵巨鎮兼四郡甲兵之事其責匪輕必長於牧御者始堪其選以爾究心謀畧有志事功仕於邊陲諳歷已久雖列屬戎監贊畫帥垣然未盡于長才復擢司於名郡其思報稱勉著勲庸

袁申儒知寧國府制

宣城巨鎮民物浩穰非明敏長才踐敬滋久者莫勝其任以爾通今博古下筆成章尤決勝于漕闡竟收功于

儒級奏使節州麾之最贊樞庭督府之籌雖陟列卿阻
還清著載念藩宣之寄盡資通練之儒爰錫綸恩俾宣
德意勉圖善最嗣有殊榮

趙希堅改知嘉興府制

雪川之政方以最聞避寵引嫌毅然求去勉從雅志爰
錫明綸以爾公族之英安恬有守甫登朝列出典輔藩
節用愛人正身率下絲毫無擾田里相安剡奏馬閑已
嘗諭旨俾令終秩云胡不留需次嘉禾以全高節益培

遠業庸副予知

吳潛改知平江府制

渙汗其號正陞法從之穹班我圖爾居無若姑蘇之巨
屏欲示優賢之意肆疏易鎮之恩具官某名冠羣英身
兼數器總餉則不加賦而足用典藩則有善政以得民
振戎事于兵曹贊廟謨於省闈方罄朝夕論思之益姑
循內外更迭之規以寵其行俾即真於起部不遠伊邇
庶蒙潤于京師矧屢試以有功當不勞而自治佇聞善

最嗣沐殊休

賈子謚知成都府制

巴蜀去天遼邈將欲宣德意而抒下情實賴賢守其於
選擇尤不敢輕以爾學本家傳美由世濟宰邑佐郡俱
著休稱暨典邊城究心捍禦安于靜退均佚琳宮載惟
潛藩方資牧養疇咨已試咸曰汝宜往服厥官勉圖政
績善最來上恩渥何涯

劉端友知遂寧府制

武信乃西蜀之巨鎮重臣法從多均佚于此繇麾節而
除者蓋異渥也以爾祖父世篤忠正思其人猶愛其木
况子孫乎幸有象賢挺挺風烈擢分帥閬庸示寵嘉瓜
期尚賒慮淹遠業復頒渙渥易鎮名藩推善政以得民
以儒術而飾吏蓋爾所已試者宜疾其驅以寬憂顧

韓括知肇慶府制

端溪潛邸也實嶺南之望郡比遭寇攘近甫安集拊摩
惠養正賴循良以爾名臣之孫踐更滋久倅貳潮陽寬

慈平易今守茲郡密邇舊封閭里戚休知之審矣過絕
囂訟檢察姦胥俾母病吾民則為稱職課最來上朕不
汝遺

高定子除軍器監依舊江東轉運副使制

有功見知則說此四牡勞使臣之詩也朕嘗三復斯言
謂將指于外苟有勞績而無以旌別之則何以作其趨
事赴功之心乎以爾擢秀儒科杖華輝映侯藩郎省所
居見稱久典將輸公勤廉介不加賦而用足真有用之

才也課最登聞趣頒召節咸願借留勉令因任擢長戎
監俾遠而有光焉蓋究乃心以須茂渥

奚概除軍器監丞兼權淮西提刑兼都督府隨
軍轉運制

領內職而攝外臺蓋異渥也以爾疏通無壅沉靜有謀
倖貳齊安協力捍禦寵以戎監勾稽之職俾綰郡符復
轉為丞兼持使節仍飛輓於芻粟以贍給於兵戎其展
壯猷以須異擢

曾穎茂直寶章閣知隆興府兼江西運判制

麾節之任其事俱繁兼而領之允為重寄以爾望隆喬
木光映棣華性資則溫乎其和才具則施無不可出奏
使節州麾之最入騰郎聞省闈之聲難久鬱於遠猷俾
再恢於游及特升邃閣擢鎮帥藩兼司將漕之權庸展
澄清之志其思報稱以俟褒遷

兵部員外郎成都運判楊履正除軍器監兼四
川宣撫判官成都府路轉運判官制

宣威總四道之權責專任重必立其貳庶相與協贊以
成制勝之功儻匪宏才曷膺茲寄以爾忠烈名家熟知
兵畧昨任綿守適值擾攘應變隨機卒安反側領計臺
而叅幕府益展壯猷肆升武監之華仍贊元戎之職并
謀合智禦侮折衝益勉勲庸以寬憂顧

虞普除直寶章閣知夔州主管安撫司公事兼
運判制

夔門當荆蜀之衝任分閫之寄者其責尤重非才高通

變長於綏馭者曷稱其職以爾量宏識遠心正氣和見
諸歷試之間蔚有可稱之實六轡如組方賴咨諏十國
為連尤資鎮撫肆陞邃閣兼領漕臺整師以修我戎給
餉不絕糧道皆汝所優為者勉圖偉績嗣有異恩

朱鑑依舊將作監丞淮西制參兼運判制

朕理內御外為官擇人計畫轉輸皆為重寄兼斯二者
必賴通才以爾人門兼美內外俱宜班行綽著於聲稱
藩屏復宣於勞績載念西淮之境實當要路之衝裨贊

制垣幹旋漕計采之公論咸曰汝宜以匠丞而兼領之其委任蓋不輕矣勉圖來效以副予知

趙以夫除兩浙轉運判官制

畿漕兼道之權事叢責重非詳練通敏隨試輒效者曷勝其任以爾學粹詞麗心醇氣和治郡則惠愛及民持節則公清振職郎闡樞屬俱著聲稱敷奏詳明尤稱朕意寓直邃閣晉陟計臺庸昭簡眷之隆盍展澄清之志尚觀來效嗣有褒遷

姚珍除福建轉運判官制

建守閩漕例多更迭蓋以閭閻利病財計盈虛知之詳而講之熟矣矧奏藩宣之最宜陞飛輓之司以爾望亞倫魁才高經濟和不流中不倚強而義簡而廉樞筦機謀正資叶贊輔藩經理勉為朕行殫一心於勞來之間措千里於奠安之域民受其賜悉懷愛戴之私予嘉乃勲晉陟將輸之寄仍兼舊治終惠編氓益觀爾能嗣頌異渥

孟黜除湖北轉運判官制

湖右諸郡困於供億財殫民匱欲稱將輸之任必資明
敏之才以爾毓秀名門究心吏事侯藩底績制閭贊謀
既所至之有聲信無施而不可漕臺兼攝休譽益彰宜
畀真除庸昭隆委揚清激濁正己理財使民不加賦而
吏皆奉法則予汝嘉往究乃心以稱朕意

錢雷震起復修職郎差充淮南運司準遣制

起復任職蓋以才選故常法不拘也爾嘗預薦墨因護

鄉井而得官齟息日虧又能措畫外臺辟舉遂奪情而充漕屬允為間見其思報稱移孝為忠

彭大雅出疆籌略多合事宜補從事郎淮西准備差遣制

制垣任重而責專有請必行庶英豪樂為之用以爾名中賢書智周兵畧出疆踰歲洞察敵情戎閫薦敬特賜真命文階幕屬併為爾榮尚克欽承毋忘報稱

陳一薦除司農寺丞兼荆湖制置司參議官制

贊畫制垣必兼內職所以重其遷也爾自掇儒科荐更
邊任典藩將漕所至見稱俾晉丞於大農仍復參於議
幕隨機應變爾所素明益展壯猷以須顯用

趙師楷除直秘閣依舊都大提點坑冶鑄錢公
事制

中秘圖書之府寓直其間號為清選非聲望顯著者不
畀也以爾被服儒雅標的宗英治郡則惠澤及民持節
則廉明振職攝承帥閫捍禦有方遂擢寘於班聯旋出

司於泉布肆加爾職俾分潛邸之符恐勤于行復任使
華之寄式昭簡眷嗣有褒遷

陳登除江淮等路都大提點坑冶鑄錢公事制
泉司總十一道之權其任匪輕欲稱厥職必惟其人以
爾蘭省上游聞多學廣入登清選出倅侯藩備殫帥垣
裨贊之勞遂進外府勾稽之職剖符名郡治最諳聞肆
疏寵以褒遷俾提綱於鼓鑄往服厥職益究乃心

黃辰顯督戰收復山城轉一官制

儒者知兵真有用之才也況立勲績褒賞可忘以爾作
邑邊陲稟命制閫督兵鏖戰奮不顧身險阻備嘗卒復
城壁進官一秩以旌其勞祇服寵榮益思報稱

韓亮朱虎陳廣轉官制

惟賞無常視功輕重則人無倖心而皆有激勵之意爾
亮捕巨寇復淮安則峻躋遙刺爾虎取盱眙則特遷三
秩爾廣有張山之捷則序進一階皆量其功而褒賞之
亦可謂公矣其思報稱毋忝朕命

朱掄祖解罷閤職轉一官制

服勤賓閣六閱歲華揆之曩章盍加恩渥爾早游胄監
蔚有休稱兩預薦書三從戎幕擢陞贊謁備著勞能茲
易畀於兵鈴宜晉躋於勇爵勿云序進嗣有恩榮

黃師參轉一官制

蠢爾凶徒嘯聚山谷侵掠郡邑民不奠居帥聞蒞師威
聲震疊執訊獲醜殲厥渠魁爾在幕中實參籌畫進官
一等用獎賢勞

孟珙轉八官以三官轉橫行五官轉遙郡制

功多有厚賞所以厲將士而為緩急之用也苟有其人
褒揚可後以爾性資明甚氣節偉然出自將門熟知兵
畧北兵為梗疆場靡寧奮不顧身鏖戰獲捷厥績甚茂
朕甚嘉之遙刺橫行併以命汝勉圖來效以稱異恩

朱子肅宋訓備禦有勞各轉一官制

凶徒倡亂侵擾郡邑突至五羊闔境震驚爾子肅定而
能應爾訓敏而有謀密贊帥垣厲兵勦捕迄臻寧靜褒

渥可忘各進一官尚思報稱

王埜知邵武日先事弭變轉一官制

先事弭變易危而安非善謀善斷者疇克能爾舍而不
錄何以示勸爾昨守樵溪凶徒北亂機籌密運殲厥渠
魁民獲堵安兵無血刃疏恩增秩庸示褒嘉列屬拒庭
益觀妙畫

盧壯父前任泰寧丞經理有勞特進兩資制

寇攘為梗民不奠居爾以邑丞勞來安集百廢具舉舊

觀復還緬思爾勞盍膺褒寵疏恩進秩尚克欽承

朱揚祖昨任荆門軍日守城有勞轉一官制

賞罰軍國之綱紀也當緩急之際畔官離次者既加譴責保障宣勞者盍示寵褒爾文武兼資艱難備歷昨守邊郡適值騷捍禦有方保全城壁晉陞一秩用酬爾庸

趙汝騰昨任權通判光州日同議調遣勦退敵兵轉一官制

蠢茲不靖侵擾邊陲爾攝倖浮光協謀捍禦旋底寧謐
盍示寵褒進陟文階其思報稱

辛起宗等轉官制

朕親閱近班程其射藝孔武有力咸精其能悉錄訓練
之功可後褒揚之典以爾稟資通敏閑習朝儀庀司端
闡靖共有恪訓齊殿直勇力倍增宜進一階以旌振職
李昂英前任廣東機宜詵諭叛卒有勞轉一官

制

凶徒倡亂聲勢鴟張直抵廣城闔郡震恐爾忠於體國
勇不顧身徑造賊營諭以逆順繼居機幕復贊籌謀遣
兵捍防迄臻平定厥績甚茂盍進一階以示褒寵

張旺勦除同寇轉兩官制

賞不踰時所以勸有功也捷奏上聞褒揚可後爾驍雄
無敵沉鷺有謀躬率兵戎驅除寇賊執訊獲醜亟奏膚
功晉陟兩階庸示激勸勉圖偉績嗣有異恩

王恕用昔日功賞轉一官制

當多事之秋苟有勞績不拘久近悉加恩渥所以厲世磨鈍也爾服勤邊鄙密效籌謀歷歲已深比方陳述戎帥既謂有所據依則賞典豈容吝也特畀一階其思報稱

高稼歿于王事轉官予職制

惟賞無常視功輕重矧著死節盍錫異恩以爾公爾忘私忠以衛上自把麾而持節每加意於練兵適當強敵之憑陵堅守孤城而捍禦見危致命允謂精忠崇德報

功當隆卹典畀以文階之峻升之學士之聯仍錄後昆
俾膺廟食英魂如在茂渥其承

黃辰顯轉一官除軍器監簿今再任制

鹽息以佐國用其利甚溥任是責而能究心措辦者悉
加恩賞爾曩贊倉幕增羨課額暨倅通川興修亭竈允
謂宣勞宜陞一秩勾稽戎監因任佐州庸示寵褒勉圖
後效

孟點任湖北運判日應辦糧草轉一官制

在昔不庭侵犯邊境調兵給餉凡服勞者悉加旌賞矧爾職專將漕應辦究心十萬師徒賴以宿飽克成偉績盍陟一階祇服恩榮益思報稱

丘岳轉一官制

敵騎侵擾民不奠居非資勞來之恩曷免流移之患爾存心惻隱極力拊摩捐公帑以貸農民俾皆復業又節浮費以償宿逋允謂區處得宜矣制垣剡薦可後褒嘉晉陟文階以示激勸

許堪轉兩官制

作屏邊城究心戎事浚濠塹而備器械百役具興而不
至擾下可謂措辦有方矣畀以兩階庸示褒寵勉圖後
效以稱所蒙

史宅之賞轉一官制

理財給餉不擾而辦疏恩遷秩庸旌爾能具官某秀出
相門進登從橐比分符於輔郡藹報政之休稱省事清
心愛人節用雖不加賦自有餘財既區處以得宜豈褒

揚之可後宜進文階之陟以旌歲課之優茂對寵光以
需異擢

魏了翁昨遇慶典應轉官制

庭闈七袞肆頒慶壽之恩文武百寮悉沐遷官之寵矧
久躋於邇列胡未被於徽章特渙明綸俾霑舊渥具官
某斯民先覺當代正人進思盡忠憂國家而如渴退不
失正付軒冕於儻來至慶霈之當陞亦辭榮而弗受今
予命汝初非濫予之私式克欽承庶合已行之典

陳天澤通判招信軍轉一官制

敵情叵測疆場未寧爾遠守邊城諳練戎事究心備禦
已遂終更因任遷官以示勸獎

劉煒叔前任吉州應辦捕寇錢糧轉一官制

凶徒為梗鄰境繹騷爾守廬陵同心體國應辦兵食為
費不貲既奏膚功可無茂賞晉陞一秩尚克欽承

陶木茶鹽增羨轉一官制

昔劉晏幹山海操贏貲以供餉饋故斂不及民而用度

足史臣稱之今日養兵之費仰給茗醪苟區處得宜則下不益賦而上無乏用課最登聞褒揚可後以爾望重時髦才優宰掾紀綱省務井井有條至於煮摘之利一經捉振亦暴如山倍於常歲宜加一秩以旌其能往究乃心益修厥職

任鄧交引循一官制

物貨如山簿書盈几典者不能徧睹此姦弊所由生也鈎攷無術其失滋多爾毓秀名門性資明敏精於綜核

欺謾莫容進陟一資尚圖報稱

楊白充修奉司部役官結局轉一官制

朕追遠謹終孝思罔極寢園修奉益致其虔督役鳩工
悉加酬賞爾預其事宜進一階

張溥昨任同安縣置陂圳轉一官制

興修水利悉有恩賞蓋以為農也爾明敏疏通勤於政
事比宰名邑增浚陂渠灌溉苗畝其惠溥矣庾臺剡奏
可後褒嘉晉陟一階其祇成命

陳均通判江州轉一官再任制

江面要衝正資防捍克勤厥職可後寵褒以爾毓秀名
門公勤明敏兩宰劇邑俱著休聲暨倅九江三攝郡政
究心備禦闔境堵安帥閫薦敬盍加旌別特令因任晉
陟一階益懋壯猷以須異渥

張毅然轉一官制

邊事方殷廣求謀畧不吝爵賞以勸來者爾倅貳淮壖
熟諳備禦願密陳於籌畫洵有志於事功先進一階以為

爾寵益圖來效嗣沐殊榮

李劉昨任成都運判日起發會紙及五綱轉一

官制

造券以佐用度必資蜀楮設官以司其局凡宣勞者悉該賞典矧爾曩任計臺實董其事既及五綱之數盍陞一秩之榮雖率舊章式昭新渥

顏頤仲修三殿畢工轉一官制

朕自臨御以來示端樸為天下先未嘗興土木之功也

然正衙便殿乃視朝聽治之所不修不飾曷聳觀瞻爾
治劇剽煩恢恢游刃程督營繕不日而成私弗擾民公
無重費進官一秩庸旌爾能雖率舊章式昭新渥

厲摸昨任成都運判起發會紙及五綱轉一官
制

鈔摺造券以佐國用司其局者苟振厥職悉加恩渥矧
爾持節計臺實總其事綱發應格允謂究心進秩一階
庸示信賞

曹叡前任浙西提舉和糴轉一官制

積貯天下之大命也矧今邊事未寧調度百出而豐歉之
不常廣糴以備緩急非心於體國者疇克如此爾司
庾西漕斂散有方賑饑恤貧民懷其德被命收糴復能
革科斂戢侵剋增價而平槩之人皆樂趨不日而辦進
官一秩以旌其能豈無異恩觀汝來效


曹叡再以和糴轉一官制

以仁存心視饑由己兩載收糴所種甚豐既陟一階再

加華秩更圖後效嗣有異恩

趙崇齊措置糴買轉一官制

西蜀餉臺專仰糴買以給軍須而供兵食爾區畫得宜
多多益辦可無懋賞以旌其勞進秩一階益恩報稱



欽定四庫全書

集部

東澗集卷八

詳校官庶吉士臣瑚圖禮

主事臣呂雲棟覆勘

謄錄監生臣吳殿英

謄錄貢生臣郭壻

欽定四庫全書

東澗集卷七

宋 許應龍 撰

劄子

論君德人心劄子

臣聞國於天地必有與立一曰君德二曰人心夫天下至大也王業至重也所賴憑藉而扶持者固亦多術矣而臣獨以君德人心為先者蓋君德厚薄乃安危之兆人心向背實理亂之基君德為正則朝廷清明治功振

起於寬厚宏博之中而隱然有不可犯之勢人心苟固則尊君親上如手足之捍頭目雖危疑緩急之秋亦無解散動搖之患故先聖人不慮國勢之不强惟慮己德之不修不慮外侮之難禦惟慮人心之未附蓋敵國外患何世無之雖虞朝之盛猶有弗率之苗民周治之隆猶有不服之崇國然舜文之心曷嘗以是為患哉文德之敷民心之洽既足以致風動之休則蠢茲有苗何慮其不格敬止之德懷保之恩足以格于來之衆則崇墉

言言亦因壘而自降矣漢唐之君雖非帝王比然漢能以公恕統天下而四百年之間舉無二志唐以仁厚結人心雖屢更變故皆不旋踵而定是知君德人心乃國家之元氣而長治久安未有不本諸此請復以國朝之事明之恭惟藝祖立極聖聖相承講學行仁求賢納諫下情通而無壅蔽之患公論伸而絕好惡之偏其正君德有如此者戒藩侯以撫養厭將臣之殺降緩故縱之誅重誤入之辟蠲河北之鹽寬陝西之稅其結民心有

如此者是以朝廷尊安基業鞏固雖澶淵西夏之驚智
高果莊之黠皆隨起隨仆卒晏然而無患是果何以得
此哉以兵而言則無大兵威以操制生人之命以刑而
言則無深責重罰以禁遏姦宄之心疑若委靡而不振
矣而二百年之間主威國勢隱如雷霆固若磐石亦惟
君德明於上人心固於下足以消姦邪之萌而杜禍亂
之原也陛下纂承丕緒尊奉慈極親近儒生開廣言路
聽斷訪問未嘗少懈出入起居罔有不欽皆所以正君

德也大風之變首議蠲免洪水之灾加倍賑恤旌廉抑
貪敷宣德意赦過宥罪務行寬大皆所以結人心也是
以天地和應雨暘時若年穀順成民生豐裕將以建大
政而興太平而疆場之防猶關宸慮然大明當天魑魅
自伏今聖德昭明賢才萃聚豈無運籌帷幄以決勝千
里之外者乎人心愛戴中外和協豈無賢於長城者為
吾之捍禦乎昔裴度言於憲宗之朝謂淮西盪定河北
底寧豈朝廷之力能制其命直以區處得宜能服其心

耳今日之事苟區處得宜隨機而應變強本而弱支則
進退伸縮無不如意尚何外患之足慮哉雖然君德人
心固所以固國之本而君德之修又所以固人心之本
然人心不難固而君德為易虧苟德修於上有加而無
已則民戴於下無時而或釋臣願陛下法乾之健體恒
之久不以躬行為已至而或怠於力行不以日新為已
盛而益期於又新則澤流而益深仁增而益高民之戴
德永永無窮將使外薄四海無思不服國勢增安猶太

山而四維之矣臣不勝拳拳取進止

論當然之理劄子

臣聞天下有當然之理不可有所激尤不可有所徇激則矯枉以過正故不合乎中徇則迎合以苟容又豈復有至當之論哉古之君子平心以應物毋固毋我惟視夫理之如何耳其行己則中不倚而和不流其待人則上不諂而下不瀆論事則明辨是非而不立異以求勝事上則將順正救不以訐而為直外不為人之所忌中

不失吾之所守安見其所謂激而又孰得以議其徇乎
此乃時中之道士大夫之所當尚也奈何人無定守視
時變遷見夫激之可以立名也則假公以濟私惡常而
好異互相矛盾不問是非若是者固不能以成事而祇
見其多事又見夫徇之可以媒進也則揣摩而求合阿
附以取容同聲相應無復可否若是者雖不至於生事
而必至於誤事握風俗之樞者將欲約其偏而歸之中
可不示之以好惡而使之知所趨避哉仰惟陛下以中

正履位以道德同俗建用皇極以革偏陂之私並用才
德以示翕受之公保合太和以杜分朋植黨之漸既不
使之過於激復不使之流於徇可為得大中之道而明
善俗之方矣然士大夫之心既不至於激則必至於和
賢和於朝固帝治之盛然和而不同斯謂之君子焉一
或苟同則其弊復流於徇是又不可不察也利害可言
也復恐時好之不合姦弊當革也復患吏強而難制難
從之請恐有所拂而曲從之不可行之事或有所迫而

強行之薦舉則多徇於私屬予決則或持於兩可若是之類皆未免有所徇也轉而移之誠不容緩今陛下不倦於聽納大臣方切於延訪以公滅私屢形於戒飭用例破法累見於申明固未嘗不欲聞正論而明公道也然作之而未應倡之而未隨者何耶昔人有言曰人臣事君之常情不從其令而從其意臣願陛下益開衆正杜絕羣枉獎端方之士振委靡之習使天下昭然知上意之所向則觀感之下孰不精白一心以承休德在位

正直之風當不愧於羔羊矣狂瞽之言冒犯天威惟陛下赦其愚取進止

論終始如一劄子

臣聞人主有善始之意固天下之所深喜亦天下之所深望也夫飛龍在天萬物咸覩意諭色授而六服震動言傳號渙而萬里奔走苟意向之或偏舉措之不審則治忽之機實肇于此今也講學以進德求賢以輔治開言路以通下情此帝王盛德之事而皆舉行於臨政願

治之初是其初意之善固足以聳動觀聽天下安得不
以為喜然是意也易長亦易消易勤亦易怠必守之以
堅行之以力則日就月將以極其緝熙之功言聽諫從
以盡其施行之實求之必用用之必信而使賢者能者
無不盡其才之嘆此豈非天下之所深望哉苟能為其
所喜而復滿其所望則唐虞三代之盛有不難致者矣
恭惟陛下以神聖之資紹延洪之業體元居正勵精思
治謂多聞乃可以建事也則銳情經術增置講官謂帝

王之德莫大于納諫也則下明詔以求直言命羣臣以上封事謂邦基之立惟在于得賢也則播告中外各舉才識凡此設施無非治道之大端則善始之意固已不容言矣然臣惓惓之忠尤望堅守而不變焉蓋自昔人主固有留意於經理者矣而為黃老養性之說或欲以沮其勤不欲人主觀書又欲以售其術稍不加察則近便嬖之時多親儒生之時少而好學之勤不能如其初矣亦有銳意於求言者矣然逆耳之諫難受順旨之言

易從一或偏聽則剴切者謂之沽名忠直者疑其訕上而悅諫之心必不能如其初矣亦有汲汲於求賢者矣然君子鯁直而易疎小人柔順而易親親則莫見其非疎則莫見其是故積年信任或一朝疑而棄之則好賢之心復有始而無終矣凡若此者皆後世人主之通患苟非天德清明純一不已未有不蹈其轍者陛下退朝之暇猶勤觀覽切直之諫優加褒擢收召耆德之臣旌表清廉之守此皆真心實德之所形見固非勉強而行

者而臣猶以堅守為言豈為是過計哉蓋自強不息斯可合乾德之大終始惟一乃可底日新之盛否則動搖于浮言而遷易於邪佞此心轉移一息間耳而治勢安危所關者大臣不復援引古昔請近述國朝之事以明之昔元祐初選擇明儒勸講經幄廣開言路增置諫員擢舊德於散地設十科以薦賢一時之治燦然更新疑若可以無遺慮矣而當時之臣猶有隱憂焉劉摯則曰已行之令持循無變則治道成王巖叟則曰惟當日篤

此心不可少移初意以至日謹一日天下之事不足慮
程頤言之終則念始不可不勉傅堯俞又言之無非欲
其堅守不變以成其初政之美哲宗信用其言故元祐
之盛度越今昔異時此論一搖或以紹述之說進或以
調停之說進則事體非復前日矣然則進言於今日者
可不以是為戒哉雖然人主一心攻者甚衆少懈而受
其一則陷溺其中而不自覺太宗皇帝嘗曰人主當澹
然無欲使嗜好不形於外則邪佞無自而入此先正其

心之意也此心一正則私欲不足以亂其真而外物不足以更其所守以之講學則專而精以之聽言則公而明以之任賢使能則無所處而不當書曰監于先王成憲其永無愆惟陛下留神取進止

論量能授官劄子

臣聞量能而授官此古者用人之術也夫人之才不能皆全或純於道德或善於才幹優於理民者將畧未必長精於心計者法律未必審校短量長惟器是適則事

無不舉分職受任或乖其宜則績用不成故有虞之世
能敷教者使作司徒能典禮者使作秩宗明五刑則命
之作士諧八音則命之典樂各專一能各守一職未嘗
迭遷而互用之故百工惟時庶績其凝而秦和之治亦
由此而致奈何後世用人不問德之所宜才之稱否既
使之治兵又使之理財方便之理財復使之典獄禮樂
之任付之若而人工技之司付之若而人以一人之身
而責之以百官之所為宜其人之難為也夫責之以所

難為則人之能為者鮮遂相率而不為故典禮者雖未知禮而不以為愧典獄者雖未知律而不以為慊其意蓋曰百司庶府皆然也吾何以知為哉固有才稱其職得以究其所長者至於遷擢或又移之他職矣所職之事苟非其所素習則不得不委之吏故吏得以容其姦而本末源流蠹弊根深蓋有不及察者流弊至此故居官者皆不度其才之短長德之小大朝欲為此暮欲為彼而有不安厥職之心然則為官擇人者其可無以處

之乎昔司馬光屢言於祖宗之朝欲博選在位之士使
德行者掌教化政術者為守長勇略者為將帥明法者
典刑明禮者典禮此正量能授官之意在今日所當講
明者而或者又曰雖量其能當久其任善於其職者增
秩加賞而不徙其官苟數遷數易則心懷去就事復苟
且是固然耳然好進者常情之所不能免儻積歲不遷
將有十年不調之嗟從事獨賢之嘆怠惰之心必生廢
事之弊猶故是則久任之說固未易以遽行也為今之

策惟精於財計者必使之理財迨其遷也復以精於財
計者代之長於銓綜者必使之典銓迨其遷也復以長
於銓綜者代之至於典禮典兵莫不皆然雖不久其任
而前後相繼者莫非其才之所長則亦何事之不舉何
職之不稱哉今日用人試金科者多處以刑法之官歷
邊事者率付以邊陲之寄此固因才授任之美意也尤
願陛下明詔大臣益廣此意精加采擇於百司庶府之
間莫不各隨其才而無強其所不能則人人各盡所長

復循名責實考其幽明而黜陟之則庶官無曠當匹休
於前古矣取進止

論薦舉劄子

臣聞薦舉而不拘其數此朝廷之美意也薦舉而或失
其實此士大夫之私心也因士大夫之私心而失朝廷
之美意豈可不思所以處之乎臣請先原其弊而後僭
陳所以變革之術夫一郡之吏察于太守一路之吏察
于諸司滿一期則有關陞之薦逾三考則有京削之薦

歲有常員截然一定固不患其濫也至若政績則聽其
剡上初無定數豈故縱其猥濫而無紀極哉蓋以效績
顯著固未易得若拘以歲薦苟未有其人必以庸常之
流勉強充數其謹重之意蓋可見矣是以剡牘來上悉
從其請或與陞擢或令審察或付中書籍記使賢者知
所勸而不賢者亦知自勉進者以為榮而未進者亦有
所慕得人之效大率由此豈非朝廷之美意乎奈何人
情貪榮競欲速化不顧職事之修否而惟欲露章之薦

引頭鑽肘刺不得已以公道自任者旌別淑慝固不肯曲徇其請而樂於周旋者見其既無定數求者必與迨其甚也一章所薦或五六人或十數人載於邸報殆無虛日合一歲而論不知其幾非親故之夤緣則勢要之囑托非關陞之所不及則京削之所未徧譽過其情則以鉛刀而為銛舉非其類則以薰蕕而同器此豈非士大夫之私心乎夫惟其出於私則賢否混淆真偽雜揉形於薦牘者未可盡信不免視為具文而一切不復

用矣吁不意求才之美意而為士大夫之私心壞之也
雖然變而通之夫豈無術一曰定剡薦之數二曰嚴保
任之法昔皇祐初詔舉縣令而張易於逼替之際併薦
一十六人上謂輔臣曰所舉猥多豈無干請可令裁定
此定剡薦之數者也馮拯請司四品以上具表舉人若
效績著明當特酬賞不如所舉依法加罪此嚴保任之
法者也數既一定則不容妄舉以徇泛應之私法既加
嚴則誰敢失實以干謬舉之罰如此則公論大明羣賢

並進得以隨才器而使之百工允釐庶績咸熙蓋有不
難致者抑又有當察者昔歐陽修有云善惡之人各以
類舉廉謹者舉清幹贓汙者舉貪濁徇私者舉請求苟
任是責者或非其人亦安能無妄舉哉太宗皇帝親閱
班簿常曰不擇舉主何由得人此清源正本之論真萬
世龜鑑也惟陛下與大臣丞圖之臣不勝拳拳取進止
論用人劄子

昔司馬光進言謂設官分職以待賢能大者道德器識

以脩諧教化其次明察惠和以拊循州縣其次方略勇
果以捍禦外侮小者刑獄錢穀以供給役使豈可專取
文藝之人欲理萬事耶然則四方之人雖於文藝或有
所短而其所長有益於公家之用者安可盡加棄斥使
終身不仕耶又曰人各有所長或優於德而嗇於才或
長於此而短於彼雖臯夔稷契尚各守一能況於中才
安可求備故孔門以四科取士若專引知識則嫌於挾
私難服衆心若止循資序則官匪其人何由致治乞朝

廷設十科以舉士臣聞天下固有一之才人主當無
執一之見蓋人才之在天下若十指然小大長短雖若
不齊而皆適於用兼收並蓄待用無遺則皆有以自見
而天下無不舉之事苟用一而廢一則互相傾軋必有
分朋植黨之弊昔臯陶謂皋羽受敷施九德咸事則俊乂
在官可以撫五辰而凝庶績奈何後世之君不知出此
文帝好清淨而豪傑之士難合武帝用才智而道德之
士見遺宣帝尚刑名而儒學之士不用皆由所尚之偏

故天下之才不能以盡用要之人主當與天同量栽培
傾覆生育長養各隨其稟賦之自然而無容心於其間
苟好惡之私先累於其中則人才高下必不能隨宜器
使而急於求進者必至迎合黨同而伐異俱欲求勝非
惟不足以成事而清流濁流之患實基於此司馬光論
任人欲取道德器識明達勇果刑獄錢穀者並用之而
長於此短於彼者不可求備此乃器使人才之要術也
嗟夫人才不同彼此異見其來非一日矣足一躡軍門

視文士如仇讐首一戴儒冠輕武弁如草芥矯矯特立
則以靜重為苟容處事詳審則以剛直為沽譽長於吏
才則以明經術者為腐儒專於學問則以了官事者為
俗吏少俊則以老成為遲鈍寬厚則以嚴明為苛刻各
分黨與判乎其不相入也人主用才惟求以辦吾事濟
吾治而已安可主一而廢一哉陛下建用皇極無黨無
偏耆德者召之文學者用之吏事者任之或長於將畧
或精於財計或以循良稱或以謹直名莫不擢用固無

一毫好惡之私然求賢之詔屢下剡薦之牘交馳而人心多私罕以實應靖退不競者無由自達單寒寡援者未免見遺臣願陛下開衆正而達四聰使任薦舉者悉叅公論舉能其官則錫以進賢之賞稱匪其人則加以謬舉之罰如此則真才實能皆為吾用而何事不立中興之烈可指日以冀耳惟陛下與大臣亟圖之

論久任劄子

臣謂久任而責成功此用人之良法也夫人人才各有所

長因其長而任之遲之以歲月則可以自見苟數遷數易則人無固志事多苟且况更代之際意向或有不同施設未免相反蒞事方新蠹弊不能盡知胥吏必生欺誕內外之治所以不能具舉者職此之由也今內而百司庶府不問人才之能否惟以職任為資歷理財未幾則又易而典禮明刑未久則復使之典教一人之身無官不可為久而不遷則懷淹滯之歎如此則百事何由舉祇見其因循歲月耳外而司監太守或一歲而再遷

或甫至而復易迎新送舊交錯於道人知吏之不久不
率其令政吏知去之不遙不究其心力是以民瘼未蘇
吏治不振其弊有不可勝言者矧邊陲之寄尤不容不
久雖以三歲為期然邇日以來移彼易此殆無虛月縱
有諳熟兵畧留意邊備之人然效未成而已去兵卒何
由而閑習備守何由而堅固今多事之秋將欲興起治
功其可不以久任為先乎內則量能而授官長於財計
者則所遷者皆理財之職明於法理者則所擢者皆法

理之任至於他官亦然克稱其職則優加旌擢使之知
勸不必遽易以強其所不能仕於外者因其有風采則
使之持節因其有政事則付以典郡庶各盡其才以圖
績效治最上聞則遷秩升職以示甄別迨其既久則擢
之以不次之職以酬其累歲之勞夫有功見知則說孰
不勉勵以稱上意吁此非難轉移者特在乎堅守而不
變耳雖然任人固不可不久而擇人尤不可不精苟非
其人則廢老者必致廢職疎謬者必致誤事而貪黷苛

刻者必至為無窮之害必詳考之於其初而後可久任
於其後此又澄源正本之論惟陛下與大臣亟圖之

論法例劄子

臣聞有法之弊有例之弊法之弊易見例之弊難革舍
法而用例此今日之大患也夫著而為律疏而為令編
次成書各有條目蓋截然而不可易也是雖有旁照有
通用舞文弄法者固未免輕重出入於其間然使有司
精明詳考而熟究之其姦莫能逃也豈不曰法之弊易

見乎乃若例者或出於一時之特恩或出於一時之權
宜有徇親故而開是例者有迫於勢要而創是例者揆
之於法大相牴牾而後來者扳援不已案牘在胥吏之
手有司不可得而知也執已行之比有司不可得而拒
也豈不曰例之弊難革乎今日之弊百司庶府凡所施
行固未嘗無一定之法然未免循積習之弊舍法而用
例焉非不知三尺之背違也執而不行恐至於拂人情
非不知冒濫之滋甚也抑而不予慮至於召衆怨遂使

胥吏得以執其柄而容其私厚賂以賈之則以為有例之可行請求之未至則匿其例而不用長吏知之而不能禁天下交病之而不敢言昔富弼有言曰近年綱紀甚紊隨事變更便為成例至使民力殫竭國用匱乏所以然者法制不立而習為例者淪胥至此也是則用例者豈非壞法之尤者乎今日之弊亦已極矣一切禁而惟法是用固為拔本塞源之論然循習之久遽爾盡革恐事勢有扞格而難行者若聽其冗濫而不為掇止則

轉相因仍必至於蕩然而無法矣昔韓琦每事用例吏持例在乎金錢之多寡以為去取琦目擊其弊取其可用者而刪其冗謬者是以吏無所容其姦事以職舉今莫若明詔有司搜求前後已用之例公共參酌可行者留之不可行者去之使之輕重得宜於法意不相違戾編為成書藏之有司凡有陳乞據此施行若是書之所不載者皆抑而不予庶幾權不在吏而奔競妄求者無所容其巧矣此亦因時制宜之一策也惟陛下與大臣

熟議而行之取進止

破朋黨劄子

孝宗皇帝嘗曰朋黨不難去惟賢是進惟不肖是退弗問其他則黨論自消漢唐末世朋黨皆數十年不能解以至禍亂其患在人君聽納之不明耳若能公是公非惟理適從何朋黨之有當時大臣因奏曰用人惟論賢否則自無朋黨如唐之牛李論者謂德裕之黨多君子宗閔之黨多小人然德裕之黨豈無白敏中之傾險宗

閔之黨豈無周墀之正直但於兩黨中用賢者黜不肖者則其黨自破也臣聞朋黨之患其來久矣不患是非之難知而患考察之不審自古欲空人之國而盡去君子者必進朋黨之說欲孤人主之勢而蔽其聰明者亦進朋黨之說此言一入則無分可否不辨真偽一槩而去之遂至朋家作仇兆釁無已苟能公心無我靜觀潛察不問其黨與之有無而惟論其人之賢否使其奉公守正協志和衷雖更相稱譽豈為比周則信之任之何

嫌其為黨使其同惡相濟假公濟私文飾姦言舐排善類則當斥之絕之以破其植黨如此則淑慝洞分疑似莫惑當使衆賢和於朝而小人無所容其跡矣尚何朋黨之足慮哉奈何世之人主意見或偏進一人焉則意其類之皆賢也並蓄兼收而不察其真與僞退一人焉則疑其徒之皆黨也斥逐無遺而不辨其是與否况進退之間或出一時之好惡未必合於天下至公焉可併其類而為之升黜縱使為君子之黨其間豈無離僞假

真而巧於附麗者乎安可例以為賢而是信是使縱使
為小人之所引其間豈無和而不同而介然有守者乎
安可疑以為不賢而盡屏盡棄然則孝宗聖訓所為若
能公是公非惟理適從何朋黨之有真萬世之龜鑑也
抑又聞高宗皇帝嘗謂朝廷用人止論其才不才言者
好以朋黨罪士大夫乃朝廷使之為黨非所以獎賢才
而厚風俗也然則為人上者惟當任賢勿貳去邪勿疑
以至公為心而盡破朋黨之論則君子道長小人道消

可以常為泰而不為否矣惟陛下留意取進止

謹命令劄子

歐陽修曰今出令之初不加詳審行之未久尋又更改以不信之言行難從之令故每有處置之事州縣知朝廷未是一定之論官吏或相謂曰且未要行不久必改或曰備禮行下畧與應破指揮符牒縱橫上下莫能遵守劉安世曰命令變更遠不過三歲近或朞月甚者朝行夕改使民疑惑欲乞出令必使大臣協謀門下審覆

臣聞言多變則不信命頻改則難從此昔人之格言也夫君者出令者也臣者行君之令而致之民者也必相與講明以求其是若順乎人心合於事宜然後布之天下其信則如四時之不移其行則如汗出而弗反若此則規模一定上下相孚為無不成政罔不舉而治效可以立致苟思之不精講之不詳聞斯行諸既不察其當否人或言則又從而中輟前後牴牾莫知適從文移雖繁徒挂牆壁歐陽修謂出令不加詳審尋又更易上

下莫能遵守劉安世謂朝行暮改使民疑惑欲乞出令
必使大臣協謀門下審覆其意正為此爾今宵旰非不
勤施行非不多然悠悠歲月莫覩成緒豈積弊難遽革
治功難驟成耶無亦數更數易而無一定之規耶履畝
恐為民之擾則復令給還混試恐人物之繁而復分諸
路雖曰更變靡定猶不失乎厚下以立本因時而施宜
至若竄謫者當以漸移乃驟還其舊秩不與親民者未
經赦宥乃遽與之注授邊功者既使之從軍而復與之

參選居官者當俾之終秩而隨即改除稱提之令荐更
鹽鈔之法屢變遂使人心皇惑雖令不從偉門一開板
援無已欲轉而移之亦無甚難惟當致謹於出令之初
則不輕變於已行之後賢果可任則任而勿貳邪若宜
去則去而勿疑利所當興則不動搖於浮言弊所當革
則不遷易於羣議如是則奉行之必虔事功之必立理
內御外殆將無不如意然而人心不難孚國勢不難定
惟在乎公與斷耳公則心無私主或用或舍悉參輿論

必不至於以一人譽而召以一人毀而棄斷則不惑羣
議或罷或行莫不當理何至輕於嘗試而遽為小不如
意而輒沮為人上者苟能守之以至公行之以獨斷則
發號施令罔有不臧人莫得以容其議則尚何變更之
有此又要終原始之道惟陛下與大臣亟圖之則天下
幸甚

欽定四庫全書

東澗集卷八

宋 許應龍 撰

劄子

論賞罰劄子

臣聞賞罰軍國之紀綱也有功不賞有罪不罰雖堯舜不能以化天下况世變已降人心寢不如古法出而姦生令行而詐起苟無賞罰以振肅之則為善者何所勸為惡者何所懲是以聖明之君必以賞罰為先務而不

敢有一毫輕重之私善所當賞雖賤必錄使為善者之
無有不賞也惡所當罰雖貴不貸使為惡者之無有不
罰也夫如是則何禁不止何法不行苟執之不堅所當
得者或慳忍而不予而不當得者乃僥求而濫授所當
罪者或經營而苟免而不當罪者反牽聯而併及勸沮
不明善惡無別故作之而不應率之而不從因循苟且
亦終於委靡而已嗚呼烹阿而封即墨威王能審左右
之毀譽而羣臣莫敢飾齊國大治矧尊為天子居得致

之位有能致之資苟於刑賞之際斷在必行則人心振起何事之不可為哉昔我藝祖肇開洪業雖以仁厚為立國之本而信賞必罰凜乎其不可犯清謹可任擢升宣徽貪墨不法徑置極典守邊有功厚加賞賜出班妄訴悉行誅戮恩威並用使天下竦然而畏慕故紀綱為之振肅國勢至於尊安成憲昭垂真萬世之龜鑑也恭惟陛下仰紹丕基恪遵祖訓勵精思治宵旰忘勞為官擇人將以宣德意而結民心選將練兵將以壯皇威而

銷外患然今之官吏果能究心於恤下乎今之將士果能用命以決勝乎竊觀州縣之間循良者固不乏而暴征橫斂峻法嚴刑者未免為民之害中外之兵驍勇者固可用而遇敵則逡巡而不前少挫則倉皇而先遁者未免為敵所輕為弊若此豈倡率之無術耶抑法令之不明耶然廉吏之舉洵頒於詔令貪墨之罰屢形於奏疏嚴私役之禁戒陞差之私若是之類日加申訓而玩習者如故何歟蓋徒善不足以為政徒法不能以自行

推原其端無亦賞罰之間猶有未信必者乎節儉正直
當賞以勸善也而單寒寡援則誰為薦引貪冒苛刻當
罰以懲惡也而稍有牽制則莫敢發摘恩賞自有成法
或攀例而放行錮黜猶未及晷已經營而希進陷陣者
或隱蔽而不申寄名者反僥冒而受賞培克有禁而曷
嘗施行奔潰當刑而隨復招集故人心玩狎雖令不從
此吏治之所以未振而軍政之所以未舉也轉而移之
其勢甚易惟於勸懲之間力加之意而已蓋不以親疎

貴賤為輕重則可以行賞罰不闊略於其大而纖悉於其小則可以行賞罰無功同而賞異罪均而罰殊則可以行賞罰執此之政如金石行此之令如四時則以之馭臣當化貪而為廉以之馭軍當變怯而為勇成效大驗特一指麾之頃耳然按察郡縣則在監司激勵將士則在主帥監司苟賢則不吐茹於剛柔不轉移於勢要貪暴者必刺循良者必舉聞風知懼當有解印綬而去者矣主帥苟公則紀律之必嚴揀閱之必精用命者賞

之犯法者誅之則畏威懷德雖蹈水火而不避矣至於
監司主帥則又不可無激揚之術苟賢否不分聽其曠
弛則委靡者可託於寬厚而振作者反幾於生事容貸
者自可以逃責而廉按者或至於召禍如此則人心疑
畏孰肯以國事為念哉臣願陛下明目達聰詳考熟察
能舉其職者莫不陟不勝其任者莫不黜則孰不激昂
奮勵求以自見登攬澄清號令精明當有如范滂光弼
者出矣此又操執綱領之要術也惟陛下與大臣亟圖

之

論講讀劄子

高宗於萬幾之暇留神六籍徧閱諸子百家之書下至近世臣子之作亦無不覽逮御經筵則曰有帝王之學有士大夫之學朕在宮中雖無一日廢學然但推前古治道有宜於今者要施行之耳非指摘章句以為文也呂公著言講學亦曰天子之學與凡庶不同必欲求立政立事之要講愛人利物之術非徒事分章析句之學

臣聞學之為王者事其已久矣古先聖人所以皇皇汲
汲者豈從事於口耳之末哉必欲見之施行以為治國
平天下之道苟講誦雖詳而大節之不完記問雖博而
至理之未明是特分章析句之學耳於國家何補哉且
經所以載道而道者治之經理觀典謨則當知帝王之
軌範觀雅頌則當知王政之廢興觀禮及樂則當知安
上而治民移風而易俗觀易春秋則當知進君子退小
人內諸夏而外蠻夷以至諸史之觀又當知成敗得失

之當鑒如此則處經事而必知其宜遭變事而必知其權天下雖大可運諸掌矣此乃帝王之學為人上者所當加意矧今外而疆場之未寧內則民力之未蘇非參稽古訓酌而行之何以興事而造業乎臣願陛下於講讀之際舉綱撮要擇其切於今日者審思明辨則物來能名事至能應修文德則可以來遠人進英俊則可以強本朝明思患豫防之戒則可以安邊境審理財正辭之義則可以足國用此乃高宗所謂推前古治道有宜

於今者施行之而呂公著所謂天子之學與凡庶不同
必欲求立事之要者亦此意也不然則博而寡要徒事
虛言之惟艱竟無成效昔太祖讀書謂四凶罪止流
竄而嘆後世刑網之密仁宗觀無逸謂享國之君宜戒
逸豫哲宗論又用三德謂此乃為政之大本得之則治
失之則亂而人主不可須臾去茲皆祖宗典學之大要
而治功赫奕實基於此監于成憲其永無愆惟陛下留
意

論將帥劄子

臣聞天下之事成於自同而敗於自異況師克在和而不在衆為將帥者苟不戮力一心互相傾軋則事勢扞格勲業何由而成然同功則相忌雖廉頗之賢猶不能免況其下者乎惟忠於衛上者則先國家之急而後私讎如藺相如之用心則并謀合智尚何強敵之足慮哉奈何人心多私惟欲求勝賢者妬之能者嫉之應援則蓄縮而不前獲捷則攘奪以為功甚至變易是非百計

讒毀惟患其成而幸其敗既無同舟共濟之意遂至形
單勢弱大敵莫當敗衄之患大率由此漢武之臣兵數
大出元朔元年衛青以三萬騎有功元狩四年青以五
萬騎無功夫兵有多寡之不同而功乃成敗之相反豈
前勇而後怯耶蓋元朔之後諸將校力戰公孫敖從大
將軍獲鹵韓說從大將軍獲鹵李蔡趙不虞公孫戎奴
又從大將軍獲鹵元戎與列校和協如此是以兵雖三
萬亦能勝元狩之間霍去病始寵青之眷始衰分兵異

出而敢戰之士皆屬去病青由是不平廣願先當匈奴而青欲出東道廣固辭之青固遣之廣卒以失期敗而青亦以不見敵不封是知將帥不和兵雖五萬亦不能成功由此觀之則師克在和不在衆真至當之論也昔我真宗因繼隆保吉更相推遜深嘉而屢歎之謂將士如此協和共圖勲業軍旅之事朕復何憂高宗因劉光世韓世忠有小嫌丁寧戒諭令以氣義相許先公家之急而無校私讎今日朕為分之遂皆感泣竟能協力以

成紹復之功今日疆場未寧正賴將帥同心合謀緩急
之際當慮唇亡則齒寒亟於救援庶幾首擊而尾應易
於成功倘以祖宗成訓昭示將帥必能仰體上意無間
彼此以圖恢復之勲然而推賞無常視功輕重苟功多
者賞不厚則宣力者有不滿之心無功者不辨別而例
加褒擢則用命者懷不平之心既不滿而不平必相傾
而相忌戒飭雖至豈能強使之和哉必處置得宜能服
其心如裴度所言則感激思奮相與協謀戰必勝而守

必固中興之功日月冀矣惟陛下與大臣亟圖之

均內外劄子

昔大中祥符中張知白上言昔唐李嶠嘗云安人之方
須擇郡守竊見朝廷重內官輕外任每除授牧伯皆避
命致訴比遣外任多是貶累之人風俗不澄皆由於此
望於臺閣妙選賢良分典大州共臻庶績淳熙間臣僚
上言伏見今之士大夫以州縣為滯路以朝廷為徑途
此內重外輕之所由致欲望聖慈鑒斯久弊特留宸慮

均分仕進之路凡郡邑之吏有治行名迹純實不欺無
間疎遠不次擢用以風勵天下孰有不勸者乎臣謂重
內輕外此吏治所以不振也夫人之情有功而見知則
說非才而任事則必有瘝曠之虞今之持節把麾者多
不安於外而慕於內內則遷擢之必速而爵賞之易崇
外則績效之雖彰而褒遷之未及故因循苟且玩歲愒
日而治效蔑聞況仕於內者或不愜物論致遭彈擊往
往畀以外任夫仕於王朝職閒事簡尚不勝任乃使之

分一郡一道之寄事叢如毛決不能理豈不為民之病乎苟於臺閣妙選賢良使之更迭以示重外之意復於監司郡守擇其有聲績者寘之朝列以示褒表至於廷紳之貶黜者則處以真館而不任以民事夫碌碌之流既不復用則有志事功者孰不黽勉以見知如是則吏稱其職而民安其業蓋有不難致者矣

汰冗官劄子

淳化中王化基論冗官之弊曰唐虞建官惟百庶政惟

和夏商官倍亦克用又蓋官不必備而惟其人今國家
庶官實倍常數盡國耗財乞相度廢省慶厯中歐陽修
言方今凋殘公私困急由官吏冗濫乞行澄汰若冗官
去則科率減吏員清不過暮月民必受賜臣聞為官擇
人則官雖簡而常若有餘為人擇官則官雖繁而常若
不足夫設官置吏所以為民豈使之無功受祿而反以
病民哉量能而後授則居其職必任其事而不才者不
敢妄覲故官不濫而財不耗徇情而輕予則奔競者必

至於僥求故官愈多而費愈廣自漢以來莫不以官冗
為病皆由為人擇官而不為官擇人耳今日之官其冗
尤甚倖貳添差大藩方置今則或創於列郡幕佐優閑
絕無掌職今則或增為兩員諸司之屬添辟無已制領
之官同正並置不釐於務者或給以正官之俸創窠闕
者多徇其親故之私至若軍功尤為泛濫不歷行陣以
議事為名而推賞初無寸功乃僥冒得官而注闕乃若
左選入仕自有成式不應陞等者妄冀陞等法當待郊

者求免待郊試銓不中則增年而注授京削尚欠則減員而改秩自陳勞績未經覈實而濫叨遷秩牽合弊例巧於經營而亦獲循資僥倖之門既開奔競之風滋熾求而不予則恐拂人情執而不行則必犯衆怨夫貪位慕祿誰無倖得之心毀法為通適啟無厭之請為政者安得每人而悅之斷之以至公律之以定法則宛轉營求者自然息念况州縣之吏勞於從事而廩給微薄無用之官反安坐而享厚祿此又所當察者伏讀開寶詔

書有曰吏員冗多而求其治誠難也俸祿鮮薄而責以廉無謂也與其員冗而重費不若省官而益俸州縣以戶口為率差減其員而舊俸之外悉與增給大哉王言今日所當取法也矧今之楮幣折閱已甚以鏹計之不及元俸三分之一何以養廉若閒曹冗局可併者併之添差創闕可省者省之冒濫得官者澄汰之扳援妄求者杜絕之一遵公法不徇私情則當得者免需久次姦巧者莫敢攘奪是非之心人皆有之則悅者衆而不悅

者寡尚何舊弊之難革哉邇者邊功皆俾從軍冒授功賞嚴行追究欺偽轉官者繳而不行妄求陞等者抑而不予固足以明示意向悉絕僥倖尤願守之以堅行之以必為官擇人而不為人擇官則各稱其職事罔不舉冗濫之弊既除俸給之費可省此乃王化基歐陽修之所已陳而祖宗之所已行也輒敢援此以為獻惟陛下與大臣亟圖之

二十五日面對劄子

臣聞韓琦之論曰天下之事惟審其是定而不易乃可成務蘇軾亦曰先定其規模而後從事治亦多術耳而獨以定為先者蓋能定而後能應天下之大事幾之繁以有限之力而應無窮之變苟所守不堅則議論之角立賢否之雜進政事之可因可革其將何以處之惟吾心有一定見以之聽言則無稽勿聽弗詢勿庸以之用人則任賢勿貳去邪勿疑以之出令則堅如金石信如四時三者既定顧何事之不可為哉恭惟陛下勵精更

始總攬權綱急於聽言則論事之切直者悉蒙崇獎上
書狂悖者亦示優容公於用人則收召耆哲招來俊彥
無一藝之不庸雖寸長而不棄謹於出令則親灑宸翰
荐頒德音或戒飭以警庶官或獎諭以勵將士聖德日
新四方風動太平之盛可躋足以待也然臣區區之愚
猶欲堅守而不變者豈故為是過計哉蓋嘗敬觀元祐
之事而參之今日之治則知定之一說信乎其所當務
也今觀其時進擬可行之言看詳奏對之疏擢舊德於

散地起忠謹於謫籍停水利而厚農桑之業罷青苗而復常平之舊免保甲而去民兵之擾一時之治絕後光前宜若可以無遺慮矣而當時之臣猶有隱憂焉劉摯則曰已行之令持循勿變則治道成王巖叟則曰惟當日篤此心不可少移初意無非欲其一定不易以為長治久安之計夫何異議之人日夕搖撼未幾國論一變或以調停之說進或以紹述之說進新學廢矣而復興之新法罷矣而復行之邊隙息矣而復啓之召釁稔禍

遂詒伊戚然則言治於今日者可不以是為監乎且今
朝廷之上凡所施行固不容議惟願不以異議而搖不
以小不如意而沮且機會可乘之言固快人意也而量
時度力則未可以舉上策自治之說若委靡不振也而
實可以圖全揣摩迎合雖若可聽然信而用之必至於
誤事忠鯁鯁直雖若逆耳然推而行之實切於時政此
心一定是非莫惑尚何築舍道旁之慮哉臣故曰聽言
不可以不定不當得而得則拔援而妄求者頭鑽而肘

刺才不足用而用則經營以求進者肩摩而袂接碩德
偉績超躡遷擢人誰敢議名實未加於上下而遽膺不
次之選則人懷倖得之心必以沈淪為恨把麾持節善
最上聞增秩進職彼自知勸若迭更數易人無固志不
惟迎送之重費尤恐績用之弗成凡此四弊一意杜絕
則各安其分無復僥覲尚何賢否之混淆哉臣故曰用
人不可以不定禁專殺謹徒刑所以示欽恤之仁戒撻
克懲貪墨所以洗舊污之染若是者斷在必行犯者勿

貸孰不凜然而知警迺若蠲免賦租固欲寬民力也而州郡迺以用度不贍而冀朝廷之裨補收納用券固掇折閱也而常賦所入虧損過半既乏現錙以應軍旅之支復窘財用以供經常之費若是者尤當通融其有無斟酌而蠲減否則迫於文移急於逃責必至創立名色肆行科罰倚法以削民何以堪若是則雖有恤下之美名未必有及民之實惠必詳考熟究使公私俱便庶可立為定制不然則朝行暮改徒為牆壁之虛文耳故曰

出令不可以不定雖然此非至難之事也特在乎一轉移之頃耳然尤有大於此者敢以關於理亂之原者陳之昔呂陶言於哲宗之朝有曰君子小人分辨則治道成邪正雜揉於朝則治體不能以純一今之君子固彙進於朝矣豈無投閑置散而未盡用者乎今之小人固斥逐無餘矣豈無潛窺陰伺以冀其復進者乎天下之患莫大乎君子有扶持天下之志而小人得參其間使不得以展布焉夫君子不得以展布君子何病也君子

一去而小人得以鼓舞而竊其權肆意妄行不至於極
敝大壞而不止然則人主果何利於此哉今大明當天
魑魅盡伏固無所容其跡然藥石於強壯之時乃臣子
拳拳憂國之忠易曰履霜堅冰陰始凝也是必防其微
杜其漸則天下可以常為泰而不為否矣臣位卑言高
罪在不赦惟陛下知其愚取進止

論寇盜劄子

臣聞當寇攘未殄之日而欲求平定之策者其大要莫

若用人然用人之道選擇貴精委任貴專報應貴速三者兼盡則有才者可以自見而任責者可以成功矣夫人固難知而才亦難得操切太過者易至於激變其懦無術者不足與辦事力小任重則臨難而必懼志廣才疎則好謀而無成必參之公論驗之已試庶乎得真實之才而為緩急之用以攻則克以守則固顧何施而不宜哉臣故曰選擇不可以不精夫疑則勿用用則勿疑苟其人之足以任是責也則委而信之體統相屬議論

歸一運動伸縮莫不如意則可以圖決勝之功事權一
分則或捕或招各自為謀相忌相傾未欲求勝緩急誰
復應援盜賊必至猖獗臣故曰委任不可以不專兵少
則不足以禦寇財匱則不足以贍兵今諸郡之卒大半
老弱傷殘之邑無復賊入縛手無策寧免奏聞況事勢
方棘延頸待報如救焚溺有求必應則可以解倒垂之
急一或稽遲則有不及事之憂臣故曰報應不可以不
速然是三者實相關係人雖可用而任之不專固不足

以成事任之雖專而有所奏陳或猶豫而不報則亦何以制變哉為人上者苟於此而加意則目前雖憂不足以為憂蓋任責有人事至能應轉危而安直反手耳苟其不然則一時之勝未足以為喜而玩心一生守備必弛事變之來將有出於意料之所不及者矣今日盜賊竊發民不奠居原其召釁則始於官吏之非人迨其鴟張則失於備禦之無術事權渙散兵財困乏遂至悠悠歲月猶未殄滅然隨機應變夫豈無策今改弦易轍任

賢使能貪者斥之懦者易之固欲精於選擇矣然豈無
已試有功可與圖事而不肯輕進者乎沈靜有謀隱於
下僚而無以自達者乎招捕特創一司郡守俾參議幕
固欲專於委任矣而投機之會間不容髮可不許以便
宜從事乎天下之事成於同而敗於異可不使之叶謀
而濟乎奏捷則亟與推賞告警則即為調兵是固速於
報應矣然不暫費者不永寧財所當用豈容不急與之
乎兵機以速為神謀或可用豈容不即聽之乎深思而

預圖之無一之不盡則以之攘外夷復境土無往不可
又何寇賊之足慮哉雖然用人之道臣已略陳於前矣
用兵之策敢僭及之夫外郡之兵其不可用固也而大
軍之遣足以壯聲勢備守禦使姦宄聞風而氣懾然山
川險要盜賊巢穴則非其所素知也潛窺而陰伺疾馳
而深入則不如民兵之捷况焚蕩之慘衆所共憤皆有
復讎之志而豪民糾集又欲為自衛之計因其鋒而用
之可以決勝已事之驗也第糗糧不繼難以持久若助

其厚給厚其賞犒而能獲寇所有者悉以與之至於功
狀顯著則又錫以誥命孰不樂為吾用復以大軍為之
應援則兵威益振其策勲也必矣但行賞之際當視功
為輕重若優於將士而薄於民兵則不惟懈體尤恐激
變此又主帥之所當察儻欲行招撫之策則盍先為不
可勝之計如聲勢未張乃卑辭厚賂以冀其服縱使聽
命猶慮反復矧頭目非一競欲邀索更作迭起未易悉
定為今之計莫若赦脅從之徒以離其黨與行反間之

術而俾相攻擊分遣重兵固守要害使之進不得前退
無所掠其勢稍屈然後從而招之罔不濟矣臣佔畢腐
儒軍旅未學輒撫輿人之論以備采擇惟陛下赦其愚
取進止

轉對劄子

當國家多事之日而欲興起治功者其大要有二議論
不可以不一命令不可以不謹蓋一則公是公非無甲
可而乙否謹則令出惟行無驟更而數易古先聖人凡

有大疑必謀及卿士謀及庶人翕然大同然後從之以為不如是則異論者得以惑吾聽巧言者得以肆其欺而國是無由定凡有政令必質之人情參之輿議罔有不臧然後行之以為不如是則上作而下不應朝行而不復改而國事何由舉奈何時君世主無獨斷之明謀臧不從不臧覆用故佞者迎合以取容而偽者誕謾而求售辦者紛更以生事而戇者矯亢以賣直各執其說互相矛盾豈知議論不一人將何所適從歟無一定之規

則慕美名而忘實惠急近效而昧遠圖事不問是非而徑欲施行法不權輕重而遽欲更革豈知命令不謹焉能經久而不變歟如此則雖有聽言之名而反為多言所累雖有善治之意而終無致治之期明主獨觀萬化之原其必有以處此矣竊觀更化以來言路廣開下情無壅論事切直者罔不嘉納上書狂悖者亦示優容建政立事興利除害戒飭官吏御札屢頒勤恤民隱詔書浚下百姓咸曰大哉王言一哉王心固宜庶政和而萬

邦寧然悠悠歲月成效杳然豈道遠難驟致事大難速
成耶推原其故毋亦議論命令之間猶有所當審者乎
且今之議論如何哉意境土之可復則獻恢拓之謀一
或少沮則謂和議之當講慮老弱之無用則申揀汰之
請及至激變則復咎區處之失宜御教之議或謂可從
或謂重費履畝之議或謂可行或謂亟免若是之類皆
議論之不一也度牒不應敷何既敷而隨免官券不必
截何既截而復造帑藏赤立遽建督府恐費用之難支

謫籍未消復頒除命恐師言之未穆若此之類皆命令之不謹也誠使決以獨見不惑羣議是者從之非者違之何至前後之牴牾作事謀始隨時施宜可則因之否則革之何患施行之不當蓋今日之弊謀雖廣而未能從衆聞雖多而未能擇善故議論不一而終難成事務名而不務實知利而未知害故命令不謹而易至反汗然議論與命令實相關係議不主乎公則命之出也必不合乎公論不當於理則令之行也必有背於理則議

論者其命令之樞乎然持是樞者實在大臣留屯之議公卿議臣以為不可而趙充國以為可魏相能主充國而先零之強不戰而服珠崖之叛陳萬年以為當擊賈捐之以為不當擊于定國主捐之而終漢之世絕無邊患此又大臣所宜加察雖然天下之事有經有權而又有機機者所以制治於未亂銷患於未形者也一或不密則害成焉其所係尤重也矧敵情叵測而備禦當嚴逆儔未馘而事變方亟謀畫精審則轉危而安處置失

宜則名譽稔禍凡一奇之出一計之畫固不容不周密也今所圖者萬分未獲其一而迹之布於天下已若泥中之鬪獸而况兵之多寡財之有無戰艦之未具城壁之或缺將帥之不和遠近傳播纖悉靡遺潛窺而陰伺者儻乘隙而投隙其能無岌岌乎且用兵之法有之不可使人知無之不可使人疑今朝廷之上雖務安靜而道聽塗說者多張皇以惑衆儻以無為有以虛為實豈不啟疑貳而滋反側乎蘇軾有言智者圖事貴於無迹

故功已成而人不知此切時之論也惟陛下與大臣亟圖之

論保治劄子

臣聞天下有向安之勢人主無幸安之心則治功有隆而無替矣夫事至而為之備患生而為之防此特苟簡目前者之見至於無事而為有事之備無患而為防患之謀非憂深思遠者豈能計慮及此人主苟以是為念則久安長治之效又焉有難致者哉易之泰曰無平不

陂無往不復艱貞無咎夫居泰之世聖人不以為可樂
而以為懼者何哉天下之理無常平而不陂者無常往
而不復者惟能艱危其思慮貞固其施為則可以無咎
夫泰者通也天下極安之時也聖人猶以為戒況未至
於極安之時乎且今日之事非臣所當僭言也亦嘗竊
觀天下之大勢矣河北山東雖入職貢而版圖猶未盡
復殘敵垂亡游魂假息而遺類猶未盡滅豪傑歸附人
心嚮應而大勲猶未遽集是雖有向安之勢又不可不

為久安之圖必思患而預防隨機而應變然後可以久
安必振發以立志果銳以圖功然後可以久安臣不敢
遠引古昔請近述高宗之事以明之敵人退避若可以
少安矣而猶欲大立其恢復之模敵帥遽斃若可以自
賀矣而猶欲自治以待其釁以至論中興之有時則謂
必有所施為而後可以得志論自古人君則以為未有
安坐而不動於四方者由是而觀則高宗固不以既安
之日而懷幸安之心故上焉有以建中天之業下焉有

以垂億萬載之基其成效大驗蓋可觀矣率由舊章豈
非今日之所當勉乎今朝廷之上亦未嘗不加意於此
也宣威置於全蜀制閫列於邊陲新復郡縣經理而綏
懷之流移邊氓勞來而安集之城壕則為之修築關隘
則為之葺理若此之類固非因循苟安者之為也然自
治之策未易畢舉將帥雖擇果皆賢於長城如李勣之
守并州者乎士卒雖練果皆藝能精銳如德裕之雄邊
子弟者乎邊食雖蓄果能有十年之積如羊祐之在襄

陽者乎若猶未也則激勵以作其氣委任以責其成使
守禦之備無一而不舉則主威益振國勢益尊中興之
業可指日以冀矣詩曰是究是圖曾其然乎臣不勝拳
拳取進止

秤提利害劄子

秤提楮幣二十餘載前後建議不知其幾敢縷數而陳
之二券易一券未免失信輸納用中半又復虧官拘上
戶以蓄券欲其競收則其價必長不知收足之後又復

如故置官場以兌便欲其易售則人必樂用不知官鏹有限來者難繼左帑金銀出以易楮而價未嘗增徒耗蓄積履畝而征將以收楮而民被其擾尋復寢罷此皆已施之策竟蔑成效今欲外此以求區處之方自顧迂疎固無以裨廟堂之末議然徧采輿論以為若聽其自然則日損一日又不可不為之慮是以比者申嚴舊法將以懲一戒百庶幾增長而州縣過於奉承計產以收其楮導人以告緡或以千百券勒富室以輸鏹或爭訟

失理而挾讎以妄訴遂使人懷疑懼莫敢允便急於得錢者未免減價私售由此折閱愈甚朝廷慮其擾民遂寬其限命下之日中外欣然今往來流通上下俱便復患價低思所以秤提之策其意固美然衆口一辭謂當漸為區處若拘以七百以上之價是增數倍二十餘年秤提竟不能踰五百左右而今欲驟長於一日之頃於勢恐難又以券多則賤欲收之以增價其議不為不善但日印十五六萬以歲計之為貫殆五六十萬縱使極

力措畫不知一日之間能收券十餘萬乎況今官券散在天下以道言之已數十千萬若收及十千萬見在尚多其價能遽長否乎若聽其流通價雖未長於百姓亦無輕重物價隨楮價以低昂但用之軍旅不無折閱之慮然隨得隨兌亦無留滯若稱提太急民復疑恐必不敢收則士卒所獲之券將安用乎當多事之秋凡百皆仰於此若無可兌之所則其患有不可勝言者今若諭以永遠行用不復更改或有破損則易以新楮仍發下

諸郡置場兌換免至中都則人亦樂收官又置兌便之局隨時價稍增民必多趨而外鋪必增錢以收受雖無速效或可漸長尤有節用一策言者雖多然節其小而不節其大所增能幾今日之券大抵耗於用兵夫兵貴精不貴多見在之兵數亦不少若訓練而激勵之其技必精敢於向前一人足當數人之用則可以省增兵之費移兵戍邊必增糧食若招邊民以填官兵之闕額就令戍守則可以省生券之費外間不必輕易則可省勞

軍之費無功者不許冒濫則可以省犒賞之費凡此數
端動百十萬至若監司郡守悉令久任則迎送之費為
可節添差不釐務不必創增職事可併者並從省罷則
俸給之費為可減如此則軍兵之費省而增造之券必
漸損州縣之費省則羨餘之券可允便此亦權時施宜
之一策不猶愈於坐視乎若欲復創一界斷作七百以
上之價而舊券聽其消長恐民復疑惑舊會愈折蓋新
者少而舊者多少者增而多者損不知可以相補否况

前此曾出一界當時雖增今新舊並為一價矣此又所
當熟慮者若夫從便之說節用之說皆人所共言者未
審果可行否其他奇策必有能建明者更望廣采兼收
參之公論求其至當庶幾上下俱便而無驟更數革之
弊臣不達時宜慮無一得僅撫輿人之論以備采擇



